

今文周易演義

今文周易演義卷之三

大明從仕郎刑科左給事中前翰林院庶吉士吳江徐師曾伯魯學

三三

乾上坤下

歸妹

三三

兌上震下

泰。小往大來。吉亨。

卦而占也。○下乾上坤。二氣相與。驩欣交通。泰之義也。故其名爲泰。以卦體言。坤往乾來。以卦變言。六往九來。小人退聽。而君子用事之時也。占者有陽剛之德。而當其時。則得遂其進。而无陰邪之傷。得行其道。而无掣肘之患矣。卦言感通之義。辭言消長之機。所取不同。而義實相發也。

彖曰。泰。小往大來。吉亨。則是天地交而萬物通也。上下交

而其志同也

上下謂君臣也。○此卽卦名而推廣之。天地之道升降相求。是以氣交而化生萬物之氣。无不通。此天地先君臣以開泰也。君臣之間。恩義相洽。是以情交而興道致治之心。无不同。此君臣後天地以成泰也。蓋乾爲天。爲上。坤爲地。爲下。而此卦體下乾上坤。故其見於造化人事者如此。皆泰之義也。

內陽而外陰。內健而外順。內君子而外小人。

陰陽以氣言。健順以性言。君子小人以人言。○本卦體卦變以廣卦辭。體有乾坤。變有九六。乾與九爲陽。爲健。爲君子。皆謂之大。坤與六爲陰。爲順。爲小人。皆謂之小。

事物雖多。不越此二端而已。但其往來交錯之變。或不能齊。於是始有否泰之分耳。惟若此卦。爲得其正。故其取義如此也。內陽外陰者。生氣流行。而殺氣潛伏也。內健外順者。義直爲主。而邪佞不行也。內君子而外小人者。君子用事。而小人見疏也。此三者。皆小往大來之義也。

君子道長。小人道消也。

長上聲
否卦同

承上文而言。君子在內。則同善相濟。而康國阜民之道。日以長。小人在外。則奸邪失勢。而蠹國害民之道。日以消。當此之時。而有所爲。自无不得其志矣。故以此爲吉亨之義也。○此與否卦。皆廣名辭以盡其蘊。如乾坤文。

言。餘卦極言之例。非但釋之而已也。蔡氏曰。以造化之本言之。則爲相交。以淑慝之類言之。則有內外。然天地既交。則必內陽健而外陰順。上下既交。則必內君子而外小人。意雖不同。而理實相貫也。

象曰。天地交泰。后以財成天地之道。輔相天地之宜。以左

右民。

初左右並去聲

后。君也。財。與裁同。象已見卦下。此不復解。乃氣化之所以開泰也。天文地理。一而已矣。以其體之自然者而言。則曰道。以其用之當然者而言。則曰宜。然皆出於无心。而又不能自致於用。是以有過不及之偏。而民之生乎其間者。亦无以遂其生矣。不有聖人。孰能財其所過。

而補其所不及哉。財成者。察時之變。經國之野。定人之
倫。制物之用。辯其所未辯也。輔相者。用天之時。因地之
利。厚人之愛。盡物之利。爲其所未爲也。然其所以如此
者。正以左右斯民。使之各厚其生。各安其分。皆得以道
天地之道。而宜天地之宜。爾是以應天致泰之治。非後
世所能及也。

初九。拔茅茹。以其彙。征吉。

茹音如。又上去二聲。彙音胃。

象而占也。茹。茅根也。彙。類也。○初當泰時。而有陽剛之
德。與上二陽相連而進。有如拔茅。而其根以類起也。所
謂事國。則同心而共濟者也。占者亦有此德。則可以遂
其進。而成輔泰之功矣。○晉郭璞。字景純。河東人也。好

經術博學。受業郭公。得青囊書九卷。遂洞五行天文卜筮之術。撰前後筮驗六十餘事。名爲洞林。
象曰。拔茅征吉。志在外也。

三陽之志。在於天下。蓋欲贊其財。成輔相之功。而不自爲一身一家之計。是以類進而得吉也。一涉於私。則是後世朋黨之說而已。何言之可言哉。

九二。包荒。用馮河。不遐遺。朋亡。得尚于中行。

馮音憑

占也。馮河。徒涉勇者之所爲也。尚。猶配也。中行。二所行之中道也。○二應五。而以剛處柔。在下之中。主乎泰而得中道者也。故其占如此。蓋當泰時。人情安肆。若不能容而亟治之。必有不勝其戾者。故當處事以漸。御衆以

寬而有包荒之量也。又人之情安於守常。苟非剛勇以振飭之。鮮有能自立者。故當決於因革。果於舉措。而用馮河之勇也。不遐遺者。圖隱微之事。舉側陋之賢。務爲遠慮。不以旣泰而遺之也。朋亡者。事不牽於私情。人不昵於親故。斷以大公。雖有所與而亡之也。能是四者。則剛柔各得其宜。而又互相爲用。我之所行。可以合於二之中道矣。治泰之道。无以加此。故特著以示占也。不言吉亨者。吉亨可知。不假言也。○程傳曰。或疑上云包荒。下云用馮河。似相反也。不知以含容之量。施剛果之用。乃聖賢之爲也。

象曰。包荒得尚于中行。以光大也。

言包荒則下三者在其中矣。舉首尾以該全文。亦小象之一例也。光者思慮明審而不昧於久遠之圖。所以察此中也。大者規模宏遠而不屑於近小之計。所以體此中也。蓋心具乎道。道運於心。故其相因如此。苟爲无本中道。豈徒行哉。

九三。无平不陂。无往不復。艱貞无咎。勿恤其孚。于食有福。
陂音

戒占也。平。安也。陂。傾也。復。來也。食。享也。○三居下極。將過乎中。天運改革之時也。故以夷險之勢言之。世道无平而不陂。以循環之氣言之。陰類无往而不復。今雖爲泰。安保其不亂乎。占者於此。若能艱危其思慮。正固其

施爲使心无不敬。動罔弗臧。以盡保泰之道。則人事旣脩。可以无咎。不必預憂陂復之期。而長享泰寧之福矣。人定勝天。理之常也。

象曰。无往不復。天地際也。

无往不復。古文作无。平不陂。此姑從今文也。天地謂氣化也。際。交會之間。○否泰交會。各有其時。三將過中。而陰往必復。正交會之時也。挽回之道。在所不容緩矣。故有艱貞之戒。

六四。翩翩不富。以其鄰。不戒以孚。

爻也。翩翩。群飛而下之貌。○四已過中。泰極而否來矣。陰邪得志。勢必復合。故與上二陰。翩然下復。不待驅以

厚力。而其類自相從。約以戒令。而衆志自相信也。君子處此。可不早見而預待之乎。

象曰。翩翩不富。皆失實也。

上卦坤體。本皆在下之物。今反居上。非分所安。名雖爲陰。而失其實矣。是以翩然下復以就安。而不假於富厚之力也。此與爻義不同。蓋以下復爲宜。而寓抑陰之意。其旨深矣。

不戒以孚。中心願也。

此承上文而言。三陰之心。皆欲下復。是以不戒而自孚也。蓋以失實爲非。則必以居下爲願矣。此孔子之易。與周公之易不同者。或泥爻辭本義。下復合交之語。而欲

強同之。失之遠矣。

六五。帝乙歸妹。以祉元吉。

祉音

爻而占也。帝乙。商王也。歸。嫁也。婦人謂嫁曰歸。祉。福也。以祉。以此受祉也。○五爲泰主。而虛中以應九二之剛。則是不恃治安。不挾勢位。而虛心以委其任於賢。猶帝乙居尊。而屈已以嫁其妹於下也。保泰之道。无以加此。故可以受祈天之福。而爲大善之吉也。

彖曰。以祉元吉。中以行願也。

以柔中之德行。下賢之願。故能有祉而元吉也。自昔人君。孰不以下賢爲願。特无中德而不能行耳。○林氏曰。唐玄宗初任張九齡。及入李林甫之譖。而恩意遂疏。宋

真宗初任寇準。及入下。謂之譴而貶斥隨至。皆由不中之故耳。

上六。城復于隍。勿用師。自邑告命。貞吝。

象而戒也。隍。城下池塹也。師。兵也。邑。我所居也。命。政令也。告。命者。脩其命而播告之也。○去否之弊而積累以成泰。猶掘隍之土而積累以成城也。及泰之終。將反爲否。則如城土傾圯而復反於隍矣。占者於此不可力爭。但當反身自治。脩其政令以回之耳。然時旣否而後爲之。旣不豫圖。又不及遠。其命雖正。亦不免於吝矣。古人制治於未亂。保邦於未危。正爲此也。

象曰。城復于隍。其命亂也。

當泰之時人情安肆。以至政亂而不治。是以復於否耳。言雖天運之當然。而實人事之所致也。治之之道无他焉。亦曰告命而已矣。

三三

坤上

漸

二

艮下

否之匪人。不利君子貞。大往小來。否備

卦而占也。大往小來。又本卦以明占也。○爲卦天地不交而二氣不通。故爲否。夫泰者。人道之常也。今謂之否。則三綱淪。九法斁。非復人道之常矣。得此占者。不利于君子之正道。義以大往小來。其時與泰正相反也。彖曰。否之匪人。不利君子貞。大往小來。則是天地不交而萬物不通也。上下不交而天下无邦也。

此推卦名及匪人之義也。上下不交。則政令不行而天下亂。故曰无邦。

內陰而外陽。內柔而外剛。內小人而外君子。小人道長。君子道消也。

剛柔以質言。○此推大往小來之義。內陰外陽者。殺氣用事。而生氣退藏也。內柔外剛者。邪媚成質。而嚴毅不能也。內小人而外君子者。小人在朝。而君子在野也。道消。即不利之謂。

象曰。天地不交。否。君子以儉德辟難。不可榮以祿。辟音避。難音聲。榮。榮之也。謂以祿加之也。○象義與卦同。君子當否。出必有禍。故但斂其道德之光。以辟小人之難。使夫名譽

不彰。微辟不至。而人不得榮之以祿也。聲光若見。則人得而榮之矣。豈辟難之道哉。班固譏龔勝爲薰膏。意正如此。項氏曰。不可榮者。言不可得而榮。非戒其不可也。○或曰。儉德辟難。何也。呂氏曰。知也。然則孔子之栖栖者。愚乎。曰。君子道其常。聖人處其變。未至聖人之地。而欲爲聖人之用。鮮不及矣。

初六。拔茅茹。以其彙。貞吉亨。

象而戒也。○當否之時。三陰並進。故爲此象。而初惡未形。猶或可反以歸於正也。使能變其妨賢病國之心。而爲薦賢爲國之舉。則位可長保。而行无不通矣。轉移之機。雖微。而始終之極。頓異。爲初六者。可不勉哉。

象曰。拔茅貞吉。志在君也。

君子之進。志在爲君。非若小人。但知有身而不知有其君也。小人而變爲君子。則亦能以愛君爲念。而不計其私矣。故可以得吉也。

六二。包承。小人吉。大人否亨。

爻而占也。○六二陰柔中正。爲能包容承順乎君子。而不遽傷之。小人之善者也。在小人如是。則名節可完。身家可保。而得吉。其在大人。則當安守其否。不爲所浼。而後道亨。若姑與其相容之迹。而不察其實有不然之心。至於失其所守。則駸駸然受害而不自知矣。蓋小人之真者不足畏。而其不純乎小人者最可畏。故其占如此。

嗚呼嚴哉

象曰。大人否亨。不亂羣也。

不以包承之故。而自混於小人之羣。故身雖否。而道亨也。○林氏曰。蔡邕之於董卓。是亂羣也。

六三。包羞。

爻也。包羞者。包藏傷善之心也。小人傷善。其心亦必有不妥者。故以羞言之。○六三陰柔。小人而有傷善之心者也。然无得位之勢。又无中正之才。雖有是心。亦不能發於外矣。故爲包羞之象。若終隱而不發。亦可免於凶咎。

象曰。包羞位不當也。

當去聲

既失其勢。又短於才。是以志於傷善而未能也。然味其語意。實非鄙其不能。猶幸君子之有此耳。

九四。有命。无咎。疇離祉。

占也。有命。以時言。无咎。以人言。疇與儔同類也。離麗也。附麗於四。以受福也。○四當否塞過中之時。而有不極其剛之德。否可濟矣。占者得之。則爲氣化將泰而有命可乘。人事合宜而動。无所咎。於是承天之休。轉否爲泰。而疇類三陽。或休或傾。皆獲其福也。豈特一身之慶而已哉。

象曰。有命。无咎。志行也。

志。謂濟否之志。○當否之時。人皆願治。特以沮於氣運。

之未通。局於才。德之未善。而不得遂耳。有命无咎。則天
人相濟。而志无不行矣。疇類之福。不言可知。

九五。休否。大人吉。其亡其亡。繫于苞桑。

繫音計
苞音包

爻占而戒也。休息也。其者。危其將然之辭。繫。結縛也。苞
叢生也。叢生之桑。其根深固。故以此爲堅固之象。○九
五以陽剛中正之德。而居尊位。爲能休息天下之否。以
致夫泰。大人之事也。故亦必有德位如五之大人。乃可
以當此占而吉。然禍患每主於所忽。才力不可以自恃。
一或不謹。必有不能善其後者。故當常存危亡之憂。而
審其保治之具。心无時而不危。行无往而不慎。如此則
制治保邦之道。无所不至。而所復之泰。如繫苞桑。不可

拔矣。然既曰大人必能如此。聖人特以是致丁寧之意耳。堯之兢兢。舜之業業。皆此意也。

象曰。大人之吉。位正當也。

當去聲。

位。猶居也。正。以德言。當。以位言。○九五有德有位。故爲大人。而有休否之吉也。

上九。傾否。先否後喜。

爻而占也。傾。覆去也。○上否極。有復泰之會。九陽剛有濟否之才。故能傾其否而盡平之。不若休之猶有漸也。前此未傾。故先否。其後既傾。則有喜矣。

象曰。否終則傾。何可長也。

否。至於極。其勢必傾。豈有長否之理乎。故得因此以成。

濟否之功也。此專指時而言。與爻義稍不同也。

三三

離上

同人于野。亨利。涉大川。利君子貞。

占也。野。郊外之地。占之象也。○以火遇天。其性同也。以二應五。其德同也。又以五陽而與一陰。其情同也。故名其卦曰同人。夫同人之道。貴乎至公。而上體乾行。則能公之義也。故占者能廓然无我。隨其所處之地。所接之人。皆與之同。而无私。既偏黨之弊。則同心者多。協力者衆。可以致凡事之亨。而濟所遇之難矣。然大同之道。貴乎得正。未有不正而得爲大同者。爲卦文明以健。中正而應。則又貞之義也。故其所以爲同者。又必合乎君子。

之正。旣不徇乎非道之悅。亦不苟爲勢利之交。乃爲于野而亨且利涉耳。苟爲不然。豈大同之道哉。按本義云。以健而行。故能涉川。蓋泥彖傳乾行專釋利涉之義而爲言也。然傳舉卦辭連上二句。則兼釋亨利可知。本義所云殆一時未定之見。而不及改耳。

彖曰。同人。柔得位得中。而應乎乾。曰同人。

以卦體六二言之。陰居陰位。德之正也。在下之中。德之中也。二有柔中正之德。而應九五剛中正之君。同心同德。彼此無間。此所以爲同人也。按本義釋卦名有三義。而彖傳獨以二五言。孰謂朱子釋經。純用孔子之易哉。同人于野。亨。利涉大川。乾行也。

此以卦德釋于野亨利之義。言同人之道貴乎公而同人之公本於健。今以乾行則剛明正大而有于野之公矣。是以亨且利涉而非以乾行專釋利涉也。學者詳之文明以健中正而應君子正也。

此以下釋利君子貞也。天理昭著不蔽於私之謂明。天理周流不屈於欲之謂健。中正者在我有純粹之德有應者在人爲同德之交。內外物我皆一於理。如此則其所以爲同者是乃道義之合而非朋比之私矣。故以爲君子之正道也。

唯君子爲能通天下之志

此君子以道言之。文明以下四者是也。○天下之理正

而已矣。人同此心。心同此正。故唯此道爲能不拂乎人心之同然。而親疎遠近。无所不通也。此大同之道。亨利之本。故特詳之。

象曰。天與火。同人。君子以類族辯物。

天在上而火炎上。同人之象也。人以族聚而爲之類之。殊其名。分其職業。使親疏貴賤。各止其所而不紊也。物以群分。而爲之辯之。察其體性。別其材質。使飛潛動植。各遂其生而不雜也。二者皆審異之事。蓋能如是。則人各從其類。物各從其群矣。致同之道。豈外是哉。

初九。同人于門。无咎。

象而占也。門。謂門外。○當同人之初。而以剛在下。又无

係應故能同人于門外而无偏主私昵之情是不問親疏遠近而惟賢惟德即與之同者也但比于野爲差狹耳。占者如是則得同人之道而无失人之嫌矣何咎之有

象曰出門同人又誰咎也

同人于黨故人得指其私而訾議之若出門同人則公道得而人心服其與同者固感其誠而不同者亦諒其心矣又誰得而咎之哉言无人咎我也

六二同人于宗吝

爻而占也。二雖中正而應九五獨與之同是爲情有所係心有偏而不能大同所謂昵近而遺遠就親而

棄疏。與于門者正相反矣。若此者。所感不公。所應亦狹。爲可羞吝。戒占者不可如是也。卦名同人。本由於此。此又別取一義。而以吝言之。與卦自不同也。

象曰。同人于宗。吝道也。

所同私狹而不公。廣吝之道也。

九三。伏戎于莽。升其高陵。三歲不興。莽反

象也。戎。兵也。莽。茂草也。高陵。阜之大而高者。興。起也。

二五正應。九三過剛。不中以處其間。而上復不應。志欲奪二。而懼五之攻。故伏戎于草莽之中。而升高遠望。以爲之備。然義既不正。勢又不敵。故雖三歲之久。亦不能興。而終於隱伏也。此爻之象如此。而凡圖非已有。雖勞

无功其爲戒深矣

象曰。伏戎于莽。敵剛也。三歲不興。安行也。

敵猶當也。剛指五。安何也。○懼五見攻。故伏兵以敵之也。夫下欲同二。義旣不正。上欲當五。勢復不敵。安能行乎。甚言其无益也。

九四。乘其墉。弗克攻。吉。

象而占也。乘者。居其上之謂。墉。城也。三之象也。攻取也。謂隔三以取二也。○剛不中正。又无應與。欲同於二而爲三所隔。故隔三而攻取之。乘其墉之象也。然以其居柔剛而不過。爲能自反於理。知攻二之非正。而不恃勇以奪之。故又有弗克攻之象。占者如是。則改過遷善。而

災害不生。其吉宜矣。

象曰。乘其墉。義弗克也。其吉。則困而反則也。

弗克。故困。則即義也。謂理之不可踰者。○四既乘墉。則非力之不足也。特以二非正應。義不可攻。而自止耳。制於義而不得通。乃反歸焉。則可以免禍矣。故吉也。三屈於義。又屈於力。四力有餘。特屈於義耳。故傳於四。獨以義言之。

九五。同人先號咷而後笑。大師克相遇。號平聲 咷音桃

象而文也。號咷。大呼而哭也。○五剛二柔。皆以中正相應。乃義理之公。同心相得者也。然伏莽乘墉。始有乖異之勢。而正應難間。終有會遇之時。故在同人。爲先哭而

後咲也。然二柔弱而易凌。三四剛強而難克。故五必奮剛勇之勢。以勝間隔之人。乃能不爲所奪。而得與二相遇耳。言所以後咲之故如此。

象曰。同人之先。以中直也。

先。先號咷也。孔氏以爲象略號咷之字。是也。中以德言。○五以剛中。而應二之柔中。其理本直。乃爲三四所間。故不勝其憤抑之心。而至於號咷也。明其情之不得已也。

大師相遇。言相克也。

言克三四。乃得遇二也。蓋不能勝間隔之人。則義理之同。鮮有不爲所奪者。故必假勢以伸其理。而後得相遇。

也

上九。同人于郊。无悔。

象而占也。○卦取同人。非絕人以爲同也。上九非可同之地。无可同之人。則絕人逃世。而非同人之義矣。故在同人爲于郊也。然既无所同。則亦无所累。故其占爲无悔也。蔡氏曰。二之吝。三四五之爭。皆起於同人之故。故上亦可以无悔也。

象曰。同人于郊。志未得也。

當同人之時。以同人爲志者也。既无所同。誰與助益。故其志爲未得也。蓋同人。則亨而利涉。不同。則志未得。故人雖不可苟同。而亦不可不同也。

三三乾下
離上

大有元亨

占也。此元亨與他卦不同。謂大善而亨也。○火在天上照臨萬國。大有之象也。六五一陰五陽應之。大有之義也。故其卦爲大有。乾健離明。居尊應天。有亨之道。故占者有其德。則禮樂刑政極其精當。而推之四海。无所不通。可保其有於无疆矣。此王道之極也。

彖曰。大有柔得尊位。大中而上下應之。曰大有。

六五居至尊之位。有大中之德。而致有之道。无所不備。由是上下五陽皆來應之。百辟從今。四方順則。而无有強梗。奸其間者。是其所有。極於至大而无外也。一統之

盛王業之隆。无以加此。此所以爲大有也。蔡氏曰。中一也。而曰大中者。以大有之時而居尊位。故其中亦爲大中。言非尋常之中也。

其德剛健而文明。應乎天而時行。是以元亨。

德。謂卦所具之君德。兼下文德體而言也。天者。理而已矣。應天時行者。述天理而時措之。非時行之外。別有所謂應天也。○此言卦有人君之德。內乾剛健。外離文明。則神謨雄斷。而睿覽聰明。所以運天下之權。而察其幾德之體也。乾體爲天。六五應之。則動與天俱。而行合時宜。所以敷憲天之政。而協於中德之用也。蓋能如是。則有以盡制作之善。而極推行之通矣。是以其占元亨也。

象曰。火在天上。大有。君子以遏惡揚善。順天休命。

象義與卦同。所有既大。善惡不齊。无以治之。則釁。釁或萌於其間。而有自此壞矣。故以惡者蠹吾有。則刑辟以遏之。而使不得售其奸。善者輔吾有。則爵賞以揚之。而使得行其志。二者懲勸之常典。御世之大權也。若此者。非以私好惡行之也。不過順天休美之命。而遏其所本无。揚其所固有者耳。蓋能如是。則人皆樂於爲善。而不敢爲惡。何大有之不治哉。

初九。无交害。匪咎。艱則无咎。

爻而戒也。害謂患害。驕侈所致之禍也。匪咎。猶言无咎。○大有之時。民物豐殖。驕侈浸生。而禍隨之。易涉乎害。

者也。然初九陽剛。有能守之德。居下。无尚大之心。无應則不溺於私交。在初。則未履乎盛滿。是猶未變其敦本之心。而動其驕奢之欲。是以未涉乎害。而得无咎。其初固已善矣。然或恃其无咎。而以易心處之。則私欲投間。將有漸入於害而不自知者。故當艱難以處。持守加嚴。以塞其源。而防其漸。乃能不至於害。而終得无咎也。

象曰。大有初九。无交害也。

當大有之時。而居初。初心未變。是以驕侈未萌。而不涉乎害。蓋專舉一義而言也。林氏曰。此條文勢。雖與比初同。而義實有異。蓋比初有孚及盈缶。皆本爻之辭。而此爻以陽居下。及无應三義。乃朱子之說。讀者不可援彼

而例此也

九二。大車以載。有攸往。无咎。

象而占也。○二以剛中之才德。而承六五之倚任。文武兼資。內外聽命。如有强壯之車。而以之載物也。占者有所往而能如是。則任重道遠。不至撓敗。而可以无咎矣。象曰。大車以載。積中不败也。

積中。謂積物於車中也。○言九二才德之强。受任於身。而不至僨敗。猶壯大之車。積物於中。而不至傾覆也。

九三。公用亨于天子。小人弗克。亨讀

象而占也。○三居公位。而以剛正之德。遇下賢之君。凡有益於治有者。必盡其誠而上獻之。啓沃陳告。一无所

隱猶爲公者隨時隨物而以朝獻于天子也。然亦必有是德乃能當之。若有公侯之位而无剛正之德是謂小人而謨猷不足以上陳。雖得此占亦弗克矣。光武功臣皆封而與謀政事。唯命三侯。即此意也。

象曰。公用亨于天子。小人害也。

言公用亨于天子之象。唯君子足以當之。若在小人則非所利也。

九四。匪其彭。无咎。彭音

爻也。○四當大有之時。處近君之位。君執柔而臣用剛。勢位逼矣。宜有咎也。然以剛居柔。不過乎剛。故能常存謙抑之心。而不爲專擅僭擬之事。其視功業皆五所有。

而不敢居焉。則位雖通而分不踰。勢雖隆而權不重。上安下從。无咎宜矣。占者得之。亦當如是。○陳氏曰。周公位居冢宰。而嗣王不忌。孔明身都將相。而後主不疑。用此道也。

象曰。匪其彭。明辯哲也。哲音

言由明辯哲然。故能匪彭而无咎也。所明辯者。君尊臣卑之分。虧盈益謙之理也。

六五。厥孚交如。威如。吉。

爻而戒也。孔氏曰。厥其也。如。語辭。○五虛中以應九二。而上下歸之。我以誠而任賢。人以誠而歸我。蓋由養賢及民。有以固結臣民之心。而交相孚信。无少間隔。所謂

柔道致治者也。然君道貴剛。太柔則廢。又當有以威之。必其明慎政體。總攬乾綱。以補其所不及。則剛柔相濟。恩威並行。可保其有而得吉矣。故因其所不足而戒之。象曰。厥孚交如。信以發志也。

六五之信。見於任賢。爲能感發上下之志。而致其歸。是以交孚而无間也。蓋人君任賢。不過尊德養民二者而已。尊德則臣効順。養民則民用情。此五之信。所以能發志也。

威如之吉。易而无備也。

易音興

君能用剛。民乃作畏。若一於柔。則人將易之。而玩法行奸。无所畏備。所有雖大。安能保乎。故必威如而後可以。

得吉也

上九自天祐之。吉无不利。

爻也。占亦如之。祐助也。程子曰。吉。自己已然者言。无不利。以將然者言。後凡言吉无不利者。放此。○惡盈好謙。天之道也。人惟自負所有。而縱慾簡賢。是以行悖乎天。而危亡立至。獨上九以剛居上。下從六五。夫五厥孚交如。信也。而上能從之。是頌信也。謙已下人。順也。而居上從下。是思順也。五柔居中。賢也。而上能從之。是尚賢也。滿而不溢。合乎天矣。是以天心悅豫。而保助之。使其身无不安。行无不利。而長亨大有之福也。此卦以上爲君。而以五爲賢。與他卦自不同也。

大有之上。盛極當衰。宜有凶矣。而此云獲吉者。實由行與天合。得天之祐故耳。明非僥倖以致之也。蓋信順者。天之理。履而思之。則與理爲一。賢才者。天之命。尊而尚之。則與命相符。是以自天祐之。而得吉也。

天之理。履而思之。則與理爲一。賢才者。天之命尊而尚之。則與命相符。是以自天祐之。而得吉也。

占也。○爲卦以艮遇坤。內止外順。心不肆而行不驕。謙之意也。山屈於地。以至高而下至卑。謙之象也。故其卦爲謙。其占亨而有終。蓋謙者。人情所與。當有亨道。今雖不居其有。而所有之實。終不得而掩焉。故今可以得亨。

而後又當有終也。必言君子者。有終乃君子之道。知君子之有終。則知小人之无終矣。蔡氏曰。始雖卑而終益尊。始雖晦而終益光。是有終也。

彖曰。謙亨。天道下濟而光明。地道卑而上行。上卦

謙

濟。謂濟物。此釋卦辭。王氏曰。天氣下降以濟萬物。天之謙也。而化育之功光明著見。則亨矣。地勢卑順。處物之下。地之謙也。而其氣上行以交於天。則亨矣。造化且然。況於人乎。

天道虧盈而益謙。地道變盈而流謙。鬼神害盈而福謙。人道惡盈而好謙。鳥路反

此以衆理發明有終之義。天有日月寒暑之消息。地有

山川陵谷之變遷榮悴禍福則鬼神之柄愛憎予奪則衆人之情莫非隨其盈謙之異而各施焉招損受益皆其自取夫豈容心於其間哉

謙尊而光卑而不可踰君子之終也

此承上文人道而言有終之義言人能謙則隨所處而獲伸也蓋居尊者其德本光又能守之以謙則人皆仰其厚而愈重之矣其居卑者分雖易踰然能處之以謙則德有以過人而莫之踰矣是則所謂君子之終者蓋皆本於人道之所好而不病於位望之不同也

象曰地中有山謙君子以裒多益寡稱物平施裒音拊稱施並去聲裒損也益增也寡少也稱如稱家有無之稱言各當其

可也。物指人已而言。○以地之卑。蘊山之高。內克實而外欲然。謙之象也。人惟上人之心多。下人之心寡。是以所施每失其平。而不得爲謙耳。君子裒損其多。不見在己之有餘。增益其寡。不知在人之不足。於以稱乎人已之宜。而平其施。使多寡之間。各適其可。而無偏勝之弊也。蓋待己宜卑。裒多所以稱己之宜。而平其施於待己者也。待人宜厚。益寡所以稱人之宜。而平其施於待人者也。君子之謙如此。豈復有自亢之悔哉。○本義亦字承彖辭本義而言。明其意有二也。

初六。謙謙君子。用涉大川。吉。

爻而占也。用涉與利涉不同。言用謙以涉難也。吉。即利。

字之意。○初六陰柔。又居下位。以能謙之資。執處下之道。謙而又謙之君子也。占者用此道以涉難。則圖謀者密。協助者多。亦能有濟而得吉矣。况居平易之地乎。象曰。謙謙君子。卑以自牧也。

王氏曰。牧。養也。爻以行言。此以心言。○卑以自養。心不上人。所謂謙謙君子者也。蓋人之德。係於所養。若能自養於禮讓之中。則客氣日消。圭角日化。而凡處已應物。自無矜肆之患矣。是以謙而又謙也。○張氏曰。今人往往反以驕矜爲養氣。此特客氣。非浩然之氣也。

六二。鳴謙。貞吉。

爻而占也。謙而有聲之謂鳴。○六二柔順中正。謙德之

盛有以積於中而著於外。故其聞譽彰著。人皆知之。謙而有聲者也。占者如是。則能合乎天理之宜。而得人心之孚矣。

象曰。鳴謙貞吉。中心得也。

聲聞本於實德。則非矯情干譽之比。是以心无愧怍。而泰然自得也。苟虛譽雖隆。而實德則病。其心豈自得乎。一云中心所自得之謙。非勉強僞爲於外者。亦通。

九三。勞謙君子。有終吉。

爻也。此君子字。屬上文。與彖辭自不同也。○三陽居上而得其正。上下所歸。德位隆而功業著。可謂勞矣。然以在謙之卦。故功雖高。而心愈下。有不自知其爲功者。勞

而能謙之君子也。如此則功莫能爭而位可長保矣。周公之於成王實用此道故特著之以示人也。

象曰。勞謙君子。萬民服也。

民猶人也。○服其勞謙能人之所尤難也。器度廣遠高出世表。豈非萬民之望哉。楊氏曰。萬民服者。非服其勞也。服其勞而能謙也。王氏曰。汝惟不矜。天下莫與爭能。汝惟不伐。天下莫與爭功。此服其勞而能謙也。一有矜伐之心。則天下群起而與之爭矣。何以致萬民之服哉。

六四。尤不利。

撝謙。

撝音

占而戒也。○六四柔而得正。上而能下。亦大臣之能謙者也。以處上下。固无往而不利矣。然居九三之上。功不

及而位過之則有不容自安者。故當發揮其謙。必使禮貌加隆。言辭加遜。暴著其謙。以示不敢掩然居上之意。然後爲得所處之宜耳。九三勞謙。本无見忌之隙。其在於四。自當如此。各盡其道而已矣。

象曰。无不利撝謙。不違則也。

則者。謙之法也。○義理當然。不爲過也。蔡氏曰。旣无不利而又撝謙。是誠過也。在四處三。則不爲過矣。

六五。不富以其鄰。利用侵伐。无不利。

象而占也。○六五居尊而有柔順之德。以謙臨下。人元不服。固有不待富厚之力而能以其鄰者。猶有未服。則爲冥頑之寇。強暴之敵。可知矣。五旣得人之歸。則宜卽

衆以伐之。而天討所加。終可必服。且於兵事。亦以得人
所與。而無不利焉。不但侵伐之利而已也。微柔懿恭之
君。其效如此。爲人上者。可不念哉。

象曰。利用侵伐。征不服也。

侵伐以征文德之所不能服。則非黷武可知矣。

上六。鳴謙。利用行師。征邑國。

爻也。○在卦之終。爲謙之極。極則聲聞於外。而人與之
矣。以此行師。固无不利。然其質本柔。又无君位。則雖行
師。亦不能布昭聖武於天下。但可征已之邑國而已。蓋
謙德可爲。而才力不足。則亦不能以及遠。故其辭如此
也。

象曰。鳴謙。志未得也。可用行師。征邑國也。

言上雖鳴謙矣。然陰柔无位。人未信從。故其志猶未得。而至於行師也。惟其如此。故雖爲人所與。而可用行師。亦僅征已之邑國而已。爻兼取其鳴謙。此專指其才力。爲義自不同也。

三三
震上

豫利建侯行師

占也。侯。謂諸侯。○以卦體言。九四一陽。上下應之。豫之意也。以卦德言。坤順震動。爲順而動。豫之由也。故爲豫。豫以建國。則百姓同心。可以託藩宣之寄。豫以行師。則三軍用命。可以收敵愾之功。故其占利於此也。蓋此二

者事關衆人非得其心則有不可故必豫而後利也二者既利則其小者不足言矣

彖曰豫剛應而志行順以動豫

志謂行道之志○四得民心其志以遂下之所以豫於上也順理而行動與衆合上之所以致其豫也

豫順以動故天地如之而况建侯行師乎

如者順而不違之謂○豫順以動言豫之德如此也夫自念慮之微以至事爲之著莫非天理而无一毫智術參乎其間則其所行與天地合雖遠且大亦默相之而不違矣况於建侯行師乃人事之近而有違之者乎甚言其利也伊氏曰言順動以得民則无往而不利

天地以順動。故日月不過。而四時不忒。聖人以順動。則刑罰清而民服。

忒。差也。○以理爲樞。二五順布。天地之動。无不順也。以故日月不過其度。而四時不愆其期。以道爲治。張弛得宜。聖人之動。无不順也。以故不假刑罰之繁。而得人心之服。蓋其所以致用者。莫非无心。无爲之妙。故其治化不勞而成。乃順動自然之符驗也。

豫之時義大矣哉。

豫之時義。順動是也。天地所以成化。聖人所以成治。皆不外此。非特可施諸事物之近而已。其時之義。豈不大哉。

考

象曰。雷出地奮。豫。先王以作樂。崇德。殷薦之上帝。以配祖
奮。震也。作。制也。崇。高也。○雷伏於地。其聲未舒。及出於
地。而後震奮。和之至。豫之義也。先王象雷之聲。取和之
義。以作樂。而聲容歌舞之節。无不備焉。則所以通神明
之德。合天人之和者。具於此矣。是以其用之也。涵泳乎
情性。而義日以精。消融其渣滓。而仁日以熟。故可因以
崇其德。及其用之之盛。則冬至祀帝于圓丘。而配之以
祖。季秋祀帝于明堂。而配之以考。亦必以是薦焉。不但
可用於閨門邦國而已也。蓋聖人之德。固不待樂而後
高大。然其從容涵泳之間。必有聖而不可知者。且其心

亦未嘗自謂已至聖也。史稱伏羲始作琴瑟以脩身理性而反其天真。正謂此也。

初六。鳴豫凶。

爻而占也。○初六陰柔而有九四強臣之應。意得志滿。以誇於人。豫而自鳴者也。占者如是。凶可知矣。

象曰。初六鳴豫。志窮凶也。

志意滿極。禍之招也。記曰。志不可滿。樂不可極。

六二。介于石。不終困。貞吉。

爻而占也。于猶如也。終日。一日也。○卦之諸爻。多溺於豫。而二獨以中正處於其間。世利紛華。泊无所好。是不溺於宴安逸豫之習。而有安靜堅確之德者也。其節旣

堅不爲物蔽。故能有以全其虛靈睿智之本然。而見幾
敏決。无所凝滯。奚俟終日而後知哉。夫能介于石。則得
持身處事之正。能不終日。則无沈溺昏迷之凶。故其占
貞吉也。

象曰。不終日貞吉。以中正也。

中正之德。足以自守。而有如石之介。故能敏於見幾。而
貞且吉也。若惟耽樂之從。而中无所主。則私欲紛擾。思
慮昏塞。事幾雖著。亦不復能知之矣。中庸所謂至誠如
神。亦卽此意。

六三。盱豫悔。遲有悔。

盱音
遲音

交而占也。盱。張目而望也。盱豫。盱而豫也。○陰不中正。

位近於四。故三上視於四。而趨時附勢以得富貴。而自以爲樂。本有悔者也。占者得之。便當速悔。若悔之遲。則必致禍而有悔矣。自古及今。未有倚勢弄權而不敗者。象占如此。爲戒深矣。按爻辭二悔字。以悔吝言。本義速悔。悔遲二悔字。以悔悟言。所指自不同也。

象曰。盱豫有悔。位不當也。

當去聲

德不足以自守。則溺於豫而不自知矣。與二正相反也。九四由豫大有得。勿疑朋盍簪。

爻占而戒也。由豫衆由以豫也。得。謂得於心也。朋。善類也。盍。合也。簪。所以聚髮者。簪之即聚。又爲速也。○九四一陽上下應之。而卦由之以成豫。是使天下各得其所。

而民皆由我以致豫也。如此則志无不遂而大有所得矣。然豫可以一人致而不可以一人保。故必開誠布公。以致天下之賢。而无一毫疑忌之心。則凡與我同類者。不疾而至。如盍簪然。皆樂爲我助矣。以此處豫。何難保之有乎。

象曰。由豫大有得。志大行也。

君子之志。在使天下各得其所而已。今既由我以致豫。則不孤其行。道濟時之願。而得遂其先憂後樂之心矣。君子所得。孰有大於此哉。吳氏曰。此卽彖傳所謂剛應而志行者也。

六五。貞疾。恒不死。

象也。占在其中。馮氏曰。貞疾猶言痼疾也。○五柔居尊。又乘九四。溺於豫而處勢危。是以威權去已。王政不行。如人有貞痼之疾。迫於死而不得愈也。然以其得中。則於君人之道。猶有存者。故能僅保其位。而不至滅亡。是疾雖貞而恒不死也。占者因中以自震。則終可以不死矣。周之威報。漢之桓靈。唐之肅代。諸君大率類此。爲人上者。可不監哉。程傳曰。在四不言失正。而於五乃見其強逼者。各據爻以取義。故不同也。

象曰。六五貞疾。乘剛也。恒不死。中未亡也。

五乘九四之剛。而黨植於下。勢孤於上。以致貞疾。然猶幸其得中。故能自保。而不至於亡。蓋所謂昏庸微弱。以

尸厥位而无大失人心之爲者。非謂其有中德也。

上六冥豫成有渝无咎

爻而戒也。○上六以陰柔居豫極。昏冥於豫。逸樂成矣。然居震體。則能變動以歸於道。而不復爲縱欺之爲。故其象如此。而占得无咎。蓋能改過。乃可以无沈溺之患也。○馬氏曰。楚莊王聽伍舉之諫。而罷淫樂。齊威王因淳于髡之諷。而行誅賞。皆所謂有渝者也。

象曰冥豫在上何可長也

在豫之上。故爲冥豫。既冥於豫。禍必隨之。其能久乎。惟動而改之。乃可免耳。

三三震上

困三三震上

噬嗑三三震上

未濟三三震上

隨元亨利貞无咎

占也。○爲卦剛來下柔。此動彼悅。已爲主而物從之。隨之義也。既得所隨。則情相通而事可濟。其亨大夫然必其所隨者。本於正道。而非違道甘悅以致之。然後理順心安而不陷於淫比之咎耳。一有不正。則雖大亨。豈能免於咎哉。○本義引穆姜語。在魯襄公九年。初穆姜徙居東宮。筮之。遇艮之八。史曰。是謂艮之隨。隨其出也。君必速出。穆姜咎之云云。且曰。必死於此。弗得出矣。至是果薨。艮之八者。五爻皆變。唯二得八而不變。故謂艮之隨也。按穆姜通公孫僑如。欲廢成公。以及於此。其不足道。然深通占法。而自知不免。則其識有過人者。杜

氏以爲辯而不德信哉

彖曰隨剛來而下柔動而說隨

下音悅

柔謂二上剛來下柔者剛居初五而屈於二上之下也
○卦凡三變皆剛下柔是以人之剛健而從我之陰柔
柔爲主而剛隨之也以震遇兌此動彼說是以我之云
爲而得人之樂從震爲主而兌隨之也二者皆物隨之
義亦可以見常分之不足拘而衆情之无所拂矣卦之
所以爲隨者以此

大亨貞无咎而天下隨時

釋利貞之義言貞者天下同然之理人能以隨致亨而
又得正无咎如此則能合乎人心之同然而近悅遠來

莫不響應矣。天下隨之。極言其效也。○三國時王肅字子雍。東海鄉人也。仕於魏。著諸經傳註。

隨時之義大矣哉。

承上文而言。隨之時義正而已矣。所隨一正而天下畢從。故其時義爲大也。夫子言此。欲人先識其效之大。而必利於貞。示人之意深矣。

象曰。澤中有雷。隨。君子以嚮晦入宴息。

澤中有雷。固時收閉。隨之象也。君子晝居於外。固无休息之理。及向昏晦。則亦入內宴息以安其身。使神怡氣清。足爲平旦造脩之本。起居有節。惟適所宜。乃隨時之道也。○或曰。周公坐以待旦。孔子終夜不寢。果嚮晦入

宴息之義乎。丘氏曰。此言君子隨時之義。彼則聖人救時拯世之心也。

初九。官有渝。貞吉。出門交有功。

爻而占也。亦戒也。官者成卦之主。指初九而言也。○隨之爲卦。本以剛來下柔。此動彼說而成。初陽在下。爲震之主。所謂剛來而下柔。此動而彼說者。隨之官也。既有所隨。則心有偏主。而於廓然靜虛之常。有所渝矣。故爲官有渝之象。占者得之。當知隨而變常。亦未爲害。但得正人而與之。則德進業脩。有益无損。而可以獲吉。又能出門以交。不私其隨。則聞見日新。德崇業廣。其益愈大矣。故又爲有功也。蓋隨人之事。人所不免。特病其失於

濫而限於私。則無以爲助耳。故因占而戒之。

彖曰。官有渝。從正吉也。

旣曰有渝。非正莫可。故必從正而後可以得吉也。
出門交有功。不失也。

隨人之道。大公而已。今旣出門以交。則无私昵之偏。而得隨人之道。是以裨益衆多。德業日起而有功也。若但一於偏主。則是失其道矣。何功之有哉。

六二。係小子。失丈夫。

爻也。係。牽係也。小子。童子也。丈夫。成人之稱。○初陽在下。才德未成。有小子之象。五陽在上。又爲正應。有丈夫之象。是二所當隨者在五。而不在初也。然位有遠近而

二以陰柔處之不能自守。是以係惡乎初而遂遺乎五。非理之所宜矣。其占凶吝不言可知。

象曰。係小子。弗兼與也。

程傳曰。人之所隨。得正則遠邪。從非則失是。二既係初。則必失五。其勢弗得而兼與也。聖人垂戒之意深矣。六三。係丈夫。失小子。隨有求得。利居貞。

爻占而戒也。所求所得。指名利而言也。○四陽在上而近初陽在下而遠。故三係四而失於初。可謂明於取舍而得隨道之宜矣。夫四當任而三隨之。有求必得。固无不遂之欲。然非正應。則有邪媚之嫌。故又戒其守貞。言當以道自持。不可以有求必得之故。而遂苟於所求也。

象曰係丈夫志舍下也

舍上聲

下謂初九○三係乎四。自謂隨得其人而終身賴之。其視在下之小子。則固非所當隨者。志必舍之而不隨矣。即此而觀。乃知二之失五。非其本心。特徂於近而勢不兩全耳。兩爻得失於此可見。

九四隨有獲貞凶有孚在道以明何咎

占而戒也。獲得也。謂得民也。孚以心言。道以事言。此二者。即明也。○九四以剛居上之下。與五同德。位為大臣。而德足以稱之者也。占者值之。則隨乎君而得乎民。其志无不遂矣。然勢陵於五。雖正亦凶。必其內積忠誠。勸為合道。而以明哲處之。則君不疑而民不倍。可以无咎。

矣。既得无咎。尚何凶之有哉。○程傳曰。此爻之義。古之人有行之者。伊尹。周公。孔明是也。其次唯唐之郭子儀平。

象曰。隨有獲。其義凶也。

權既歸已。勢必陵君。故其義有凶也。袁氏曰。其義凶者。有凶之理。而未必凶也。處得其道。如下所云。則无咎矣。有孚在道。明功也。

言明哲之功也。蓋由中心明達而知爲臣之分。與其禍福之機。是以有孚在道。而无僭逼之嫌也。若无所見。安能知善處之道乎。按爻以有孚在道爲明。而此則推其本於明。義雖異而實相發也。

九五孚于嘉吉

爻而占也。○六二柔順中正。臣之美善者也。五以陽剛中正應之。知之深。任之篤。嘉言嘉猷靡不信從。而无一毫疑忌之心。是信于善也。占者如是。則上下交而德業成矣。

象曰。孚于嘉吉。位正中也。

位。猶言居也。正中。以九五之德言。○同德相信。自然之理。五惟正中。故能知二中正而信任之。苟无其德。則是非之鑑不明。取舍之極不定。安能信善而得吉哉。

上六拘係之。乃從維之。王用亨于西山。

象而占也。拘。執也。係。羈也。乃者。更加之辭。維。束縛也。○

上六居隨之極。是其所以隨人者。情義相維。終始無間。孚誠固結。而不可解者也。王者用此誠意。亨于西山。則神亦隨之矣。况於人乎。

象曰。拘係之上。窮也。

居卦之上。隨道之極。故其誠意如此。○蔡氏曰。隨有始終。見於初上。隨有邪正。見於二三。有以臣隨君之道而言者。九四是也。有以君隨臣之道而言者。九五是也。學者合而觀之。則隨之道亦略備矣。

三三 巽上 貴三三 艮上 井三三 巽下 坎上 既濟三三 離上

蠱元亨利涉大川。先甲三日。後甲三日。蠱音古。先後並去聲。

占而戒也。○卦體與變剛柔不交。又其卦德為巽而止。

皆所以成蠱也。蠱極思治。時當大亨。而人事可爲之機。在於此矣。故當勇往直前。不避艱險。以救之。如涉大川。乃爲利也。然與其救之於既壞之後。孰若治之於將壞之時。故於前事過中而將壞者。則自新以求興。壞補敝之端。使不至於大壞。後事方始而尚新者。則丁寧以圖久安。長治之策。使不至於速壞。如此。豈復有至於蠱者邪。故特著以示占也。程傳曰。先甲三日。以救蠱也。後甲三日。以備蠱也。善救。則前弊可革。善備。則後利可久。此古之聖人。所以新天下而垂後世也。後之治蠱者。不明此戒。是以勞於救世而亂不革。功未及成而弊已生。彖曰。蠱。剛上而柔下。巽而止。蠱。

兼體變而言之。剛上柔下。君亢臣卑而兩情不通也。專以德而言之。下巽上止。臣諛君情而庶事以曠也。此皆致蠱之道。故其卦爲蠱也。蓋世之治。必以君臣交接與其勵精圖治而成。今旣不然。則弊日積而爲蠱矣。

蠱元亨而天下治也。利涉大川。往有事也。

雖當蠱時。亦必有治之者。治之而極。至於元亨。則天下將治之機兆於此矣。往而有事以求治之。豈非人事之當然哉。

先甲三日。後甲三日。終則有始。天行也。

亂極開治。天運之常。必待其極而後救之。則晚矣。故當豫爲之所。而先甲後甲以治之也。

象曰山下有風蠱君子以振民育德

振作也。○山下有風披拂摧落萬物因以撓亂而將有事於更新矣。蠱之象也。振民者作興彼之善新民之事也。育德者培養己之德明德之事也。蓋時至於蠱則教陵谷敗故治之莫要於振民而新民之本必由自新故振民當先於育德君子有事莫大於此從事二者則爲有以盡治己治人之道而盡无不濟矣

初六幹父之蠱有子考无咎厲終吉

父占而我也考者父生死之通稱今人但知父死曰考而不知康誥所謂大傷厥考心乃指生者而言也无咎者克蓋前人之愆也。○初在卦始其蠱未深爲能因其

易濟之機而承當之。幹父之蠱之象也。占者如是。乃爲有子。而考得无咎。然旣曰蠱。亦已危矣。不可以爲未深。而遂易之。必其知危而戒。善救豫防。然後蠱无不治。而考得終吉耳。苟不能然。豈得爲有子哉。

象曰。幹父之蠱。意承考也。

初幹父蠱。其意在於承當父事。而置父於无過之地也。蓋積弊爲蠱。固前人之所致。而克承前業。實人子之自盡。故又推其心而言之。苟无是心。安能幹父之蠱哉。

九二。幹母之蠱。不可貞。

象而戒也。貞者。自以爲正而堅守之也。○五陰居尊。母之象也。而二以剛中應之。能幹其蠱。則是勇於有爲。而

治所當治矣。然以剛承柔。則必不免於拂戾之失。故又戒以不可堅貞。言當屈已下意。巽順將承。使之身正事治而已。不可任已之才。伸已之志。而至於矯拂以傷恩也。苟或不然。則蠱雖濟。亦不得爲孝子矣。聖人之於名分。其謹如此。

象曰：幹母之蠱。得中道也。

二得中道。則无怠事之愆。而行當幹之事。故能幹母之蠱也。此未及釋不可貞之義。九三。幹父之蠱。小有悔。无大咎。

爻也。悔以心言。咎以理言。○三居下體。以承上事。亦幹父之蠱者也。然以過剛不中。則更張无漸。而措置乖方。

不免小有拂戾之悔。然幸其巽體得正。可以濟剛而補其不中。人情事體猶未甚乖。故猶不至於大咎也。曰小有悔。則元大悔可知矣。曰无大咎。則有小咎可知矣。語意蓋互相發。

象曰。幹父之蠱。終无咎也。

三幹父蠱。雖小有悔。然巽體則能順乎理。得正則不陷於偏。是以更張有漸。經理有方。而終得无咎也。豈特无大咎而已哉。爻言无大咎。此言終无咎。蓋勉而進之之意也。

六四。裕父之蠱。往見吝。

爻也。○重陰才弱。不能有爲。是以樂於因循而憚於更。

變寬裕以治蠱之象也。如是而往。立見羞吝。惟當奮迅以救之。乃可免耳。劉氏曰。強以立事爲幹。怠以委事爲裕。事弊而裕之。弊益甚矣。○或疑初六陰柔。乃獨幹而不裕。何也。蔡氏曰。蠱壞之初。柔猶可幹。至四而亦以柔處之。則不復能有爲矣。况重柔乎。又問三四孰優。曰。過猶不及。必不得已而行。寧悔无吝。此君子所以重夫剛也。

象曰。裕父之蠱。往未得也。

言不足以有濟也。

六五。幹父之蠱。用譽。

父也。占亦如之。○五柔中以應九二。而二以剛中承之。

乃繼世之賢君也。是以能幹父蠱。赫然中興。而善繼善述之譽。自洋溢於中外矣。商高之於傳說。周宣之於仲虺。其事類此。彼自用者。亦獨何哉。

象曰。幹父用譽。承以德也。

德。謂剛中。○幹父用譽。非五所能。良由九二承之以德。而致然耳。蓋剛以立事。則无卑巽之失。中以善事。則无矯激之弊。以是承君。故能幹蠱而用譽也。然非五之柔中。則二雖欲承之。亦不可得矣。

上九。不事王侯。高尚其事。

爻也。不事。事謂臣。其事。事謂道。○上九剛陽居上。而不當治蠱之任。故不委質以事人。而惟高潔以樂道。優游

自得。不累於世。非賢者不能也。故其取象如此。而占當如是。又戒其不可不如是也。

象曰。不事王侯。志可則也。

則法也。○言上之志清而不汙。可以爲後世之法也。○馬氏曰。上九之志。可爲法則。是固不離於中庸之道。若夫潔身亂倫。長往太過。則不足以爲法矣。

三三
兌下
坤上

臨。元亨利貞。至于八月有凶。

占而戒也。○二陽浸長。勢凌於陰。故其卦爲臨。而卦之德。內說外順。九二剛中。而五應之。又臨之善道也。故其占大亨而利於正。蓋當剛長之時。又有德體之善。是以

陰類可去而陽道大行。然又必守正理。使所行者合卦之善。然後可以得亨。不可恃其既長而遂妄有所爲也。又以陰陽消息。天運相尋。今雖向盛。然豈終无衰亂之時乎。自復至遯。卦凡八爻。則陰漸長而陽有凶矣。戒占者思患豫防。而不爲无及於事之悔也。聖人所以爲君子謀者。蓋如此。吳氏曰。臨小人者。先自治以服其心。不枉道以招其謗。正其爲。勿使有差。謹其幾。勿使或露。夫然後可以免害而成功。此臨之所以必利於貞也。

彖曰。臨。剛浸而長。巽上

程傳曰。浸。漸也。○前此爲復。陽氣尚微。未有逼陰之勢。至此二陽浸長於下。則雖无意於逼陰。而勢自不可禦。

矣。蓋君子之於小人，不容並立。故其機如此。乃臨之所由名也。

說而順剛中而應說音

存主和平之謂說。施爲當可之謂順。皆言其從容而不迫也。二有剛中之德。上有得君之助。又言其相須而可爲也。臨陰之道。莫善於此。故其辭如下文所云也。

大亨以正。天之道也。

承上文兩節而言。天道者。天理之當然也。當臨之時。又以此善。是以亨非倖致。乃理之所當得。真非過慮。乃理之所當行也。若與卦背。豈占之所宜哉。

至于八月有凶。消不久也。

指陽而言消在八月不待久也言此以危君子使預爲之備不可委於天運之自然也

象曰澤上有地臨君子以教思无穷容保民无疆思去聲

教思教人之意思也窮盡也容保受而保之也疆限也○澤上有地地臨於澤臨之象也君子於民教之而意思无穷則義如兌澤之深養之而容保无外則仁如坤地之廣居上臨下之道何以加於是哉

初九咸臨貞吉

爻而占也丘氏曰咸皆也○初陽方進以通群陰有咸臨之象矣然剛而得正處得其宜又臨之至善也故占者得之必其所以爲臨者合於正道而无恃勢用罔之

爲則可以制小人而得吉矣。意與卦同。吉即利也。

象曰。咸臨貞吉。志行正也。

釋貞字之義。言志在行正。不苟臨也。所謂正者。自治之嚴。慮事之密而已矣。

九二。咸臨。吉无不利。

爻而占也。○九二陽剛。徧臨四陰。故亦爲咸臨之象。然剛得中而勢上進。則其舉動之善。權力之隆。比初又不同矣。是以陰黨可去。陽道大行。吉而无不利也。占者必有其德。乃應其占耳。

象曰。咸臨。吉无不利。未順命也。

本義未詳。不敢強解。時說紛紛。皆不足據。唯謂四陰未

肯順從二陽之命。故咸臨以逼之者。略通然未知其是
否也。

六三。甘臨。无攸利。既憂之。无咎。

爻而占也。甘。美也。臨。泣也。與卦名異。○陰不中正。下臨
二陽。小人在位。而以甘言臨下之君子。甘臨之象也。以
此臨人。必不能動。亦何益之有哉。然制行在我。改過爲
貴。若能憂其无益而遂改之。則得臨人之道。而无邪媚
之失矣。○項氏曰。六三甘臨而无攸利。見君子之難說
也。既憂之。无咎。又見君子之易事也。其處已也嚴。故不
受不正之媚。其與人也寬。故不治既憂之人。爻辭雖爲
六三言之。然亦可見二陽之用心矣。

象曰。甘臨。位不當也。既憂之。咎不長也。當去聲下同

陰不中正。故爲甘臨。然既憂之。則咎不久而可免矣。聖人所以重改過也。

六四。至臨。无咎。

爻也。至。猶切也。臨。猶親也。謂相臨也。○以六四之柔正。應初九之剛正。而道義相成。意氣相投。是以親厚之情。獨爲切至。非若外親而內疎也。既能如是。則倚賴得人。而无孤立之咎矣。

象曰。至臨。无咎。位當也。

四以柔而得正。初以剛而得正。是以志同道合。而親厚獨至。若非位當。則雖見賢而未必親。雖親而未必篤矣。

安能至臨而无咎哉

六五知臨大君之宜吉

知去聲

爻也。臨與三同。謂臨民也。○知者以先務爲急。君道以守約爲宜。五當臨下之任。而柔中應二。求賢自輔。執簡御煩。是其所以爲臨者。乃知之事。而大君之所宜也。以是爲政。則已不勞而天下治矣。故吉也。

象曰。大君之宜。行中之謂也。

勞於求賢。逸於得人。乃天理當然之極。所謂中也。然以世主而言。賢者好於自用。而過之。愚者昧於任人。而不及。能行此者。蓋鮮矣。五惟柔中。故能行之。則所謂大君之宜者。卽此而在。苟以一人之身。區區自任。以求周於

萬事必不及矣。夫豈君道之當然哉。

上六。敦臨。吉。无咎。

爻而占也。臨義與六四同。○居卦之上。處臨之終。臨人
之意。積而至於極矣。是以其與初二相臨也。情義敦厚。
久而不衰。則既有得乎同心之資。而又不失乎善交之
道。吉而无咎者也。故占者如是。則吉且无咎矣。陳氏曰。
表裏如一之謂至。終始无間之謂敦。合二爻而觀之。則
相臨之道亦略備矣。

象曰。敦臨之吉。志在内也。

内。謂内卦二陽也。二陽在下。其德可貴。上欲與之相臨。
而念念不忘。是以愈久而愈篤也。

三三 坤上下

觀盥而不薦有孚顒若觀音管

戒占也。盥薦孚顒占之象也。○爲卦九五在上。四陰仰之。觀之位也。以坤遇巽爲順而巽觀之德也。又五以中正示天下。觀之道也。故其卦名爲觀。其占言君子在上而欲觀天下者。當守中正之道。而不輕有所爲。則賁德在已。而可爲民表。猶祭者致其盥濯之誠。而未奉酒食以薦。則孚信在中。而顒然可仰也。蓋祭者以誠敬爲主。而未及於薦。則其誠敬常存。觀者以中正爲道。而輕於自用。則與中正相反。故凡視聽言動。皆當爲天下法。而不敢輕。則爲有以中正示人。而爲人所仰矣。按祭未有

盥而不薦者。此特借之。以明精一慎重之意耳。

彖曰。大觀在上。順而巽。中正以觀天下。

二觀並去聲

以中正之道示人。而爲人所仰者。觀之義也。然必德位兼備。然後其道有以爲基而立。此卦九五在上。大觀之主。而能順以存心。巽以處事。則其德位无不備矣。是以其觀天下也。行之以中。立之以正。於以建皇極於其上。而使天下有所取法焉。所謂建中於民。表正萬邦者也。卦之所以爲觀者。以此。

觀盥而不薦。有孚顒若。下觀而化也。

上觀去聲。下觀平聲。

釋卦辭。而以其效言之。蓋能如是。則下有所觀感而化矣。蔡氏曰。盥而不薦。有孚顒若者。以中正示人。而爲人

所仰也。所謂建其有極也。下觀而化者。人皆仰之而歸於中正也。所謂歸其有極也。

觀天之神道而四時不忒。聖人以神道設教而天下服矣。
觀平聲

服者。從其教也。○上天之載。无聲无臭。乃天之神道也。即此觀之。則見四時之序。運行有常。而神道有可徵之迹。建中表正。不大聲色。聖人之神道也。惟其如是。是以天下之人。默順帝則。而神道有无爲之功。蓋其所以爲觀者。莫非天理流行。妙道精義之發。故其神化。至於如此。此觀道之所以爲大也。然所謂神道設教者。不過盥而不薦。有孚颙若之自然。而天下之服。亦即下觀而化。

之極致。故又極而言之。實非有兩事也。

象曰。風行地上。觀。先王以省方。觀民設教。

上觀去聲。省察。反音如醒寤。

觀之平聲。

風行地上。由歷周徧。巡行觀覽之象也。先王以身率人。固足以道民於中正之域矣。然猶慮夫風土異宜。習俗異尚。有不能約而同者。故又巡行方國。以觀民俗。而因民俗以設教典。使同歸於中正之道。亦若風行地上而物无不被也。按古者天子五載巡狩。時行方岳。今太師陳詩以觀民風。命市官納價以觀好惡。皆所以觀民也。齊之末業。教以農桑。衛之淫風。教以禮別。奢如曹則示之以儉。儉如魏則示之以禮。皆所以爲觀也。○陳氏曰。

神道設教道之以德也。觀民設教齊之以禮也。有孚顒若。則觀之體立。觀民設教則觀之用行矣。

初六童觀小人无咎。君子吝。

觀平聲下五爻並同

象而占也。童者幼稚之稱。小人細民也。君子謂在位之人。九五在上。為下四陰所觀。而四陰之觀於五者。則以相去之遠近。為所見之大小。初六在下。去五最遠。又以陰柔才弱。所見淺近。是以不能振拔。以觀大君道德之光。如童稚之人。无遠大之識也。下民如此。固不足咎。若在位者而亦如之。則是才德不足。自棄於時。而可羞矣。占者不可如是也。

象曰。初六童觀。小人道也。

言童觀乃在下小人之常分。非君子之所宜也。

六二。闕觀。利女貞。

闕音窺

象而占也。字書云。闕。門內視也。○陰柔居內。聞見未廣。如居門內而觀上國之光。不可得已。故爲闕觀之象。而其占則利於女子之正道。蓋婦无外事。乃分之常。若在丈夫。則非所利矣。

象曰。闕觀女貞。亦可醜也。

居內觀外。所見无幾。丈夫之醜事也。

六三。觀我生進退。

爻也。我者。彼此對待之稱。言以彼觀我也。我生。謂出於我者。○六三居下之上。可進可退。其於九五大觀之君。

不必觀矣。惟當觀吾所行之通塞。以爲進退耳。蓋德无不孚。行无不得。則進德有未孚。行有未達。則退。是皆已分之當然。豈特視時而已哉。

象曰。觀我生進退。未失道也。

道謂進退之道。○行通而進。則進非干時。行塞而退。則退非忘世。何失道之有哉。

六四。觀國之光。利用賓于王。

爻而占也。賓。謂賓賢之賓。言爲王者之所賓也。○當觀之時。最近於五。凡君德之形於制作。而煥然昭布於國者。四皆得而親見之。觀國之光之象也。占者得此。利賓于王。言當隨其臣庶之分。而爲朝覲仕進之舉。亦如四

之觀光也

象曰。觀國之光。尚賓也。

尚。尚之也。○君子處世。未嘗无尚賓之念。而患无際遇之時。四既觀光。有其時矣。則孰有不樂就而尚其所賓者乎。必言賓者。明君在上。以人爲政。則必賓禮朝覲之臣。賓興賢能之士。相與圖治。而爲之臣與士者。亦各從而尚之。以效旬宣之職。而成達道之功。非特爲寵遇之故而已也。爰言賓王以觀光。此言觀光而後賓。義亦小異。蓋以互相發也。

九五。觀我生。君子无咎。

戒占也。○九五陽剛中正。以居尊位。而爲四陰所觀。固

不必觀其所行而知其爲君子矣。得此占者。觀我德政。必其陽剛中正。亦如五之君子焉。然後已。不失德。民不失望。而可爲觀於天下耳。否則是以不肖之身。苟臨民上而已。豈能免於咎哉。

象曰。觀我生。觀民也。

民之視效。係於君身。君之得失。驗於民俗。故夫所謂觀我生者。不但自觀而已也。必察民德之善惡。以驗風化之何如。而後觀我生之道始盡。善則加勉。否則改之。乃能合於君子之道而无咎也。此義隱微。人所未曉。故特指而言之。

上九。觀其生。君子无咎。

戒占也。其者指上而言。乃上自觀而人稱之之辭也。○
上九陽剛居五之上。亦君子之象也。故戒占者觀其所
行。必其言動可則。如上之爲。則无負於賓師之任。而可
以无咎矣。○本義主賓。謂觀我生。爻爲主。而占者爲賓
也。觀其生。占者亦爲賓。而他人爲主也。
象曰。觀其生。志未平也。

平。安寧也。○上當師任。其志未安。故其反觀如此也。

今文周易演義卷之三